

Gobernador di Aruba a nombra Tisa LaSorte como informador

Mediante un comunicado Gobernador di Aruba, Su Excelencia Alfonso Boekhoudt, a anuncia cu Tisa LaSorte lo asumi e rol di informador pa a proceso inicial pa loke ta trata formacion di gobierno nobo.

Despues di varios ronda di consulta e siman aki en conexion cu formacion di un gabinete nobo, Gobernador di Aruba a indica cu a consulta cu conseheronan y cu e lidernan di e partidonan politico cu durante e eleccion di 6 di december a haya un of mas asiento di Parlamento di Aruba.

Despues di e consultanan aki, Gobernador a nombra ayera 11 di december 2024, Sra. Tisa LaSorte como informador. Ora di scoge un informador Gobernador ta tene cuenta cu entre otro e resultado di eleccion, e informacion obtene cerca conseheronan y e lidernan di partido y e exigencianan cu e proceso di informacion ta impone riba



e informador cu mester ser nombra.

Teniendo na cuenta cu esaki, Gobernador di Aruba a enfatisa su compromiso

pa nombra un informador pa e proximo ronda di informacion cu ta un persona independiente den relacion cu e partidonan cu a logra haya un asiento den

e Parlamento nobo. Responsabilidadnan cu ta cay den man di e informador ta investiga cual opcionnan tin pa forma un gabinete cu tin e confiansa di un mayoria den Parlamento y cu ta enfoca riba hiba un politica financiero-economico sano y cu ta pone atencion na e gastonan di costo di bida na Aruba.

Segun e Gobernador a sigui informa mediante e comunicado, si acaso cu por forma un gabinete asina, e informador mester convence e partidonan politico envolvi pa firma un declaracion di bolutad. Den e documento aki, e partidonan ta declara cu nan ta dispuesto pa forma un gobierno di coalicion hunto.

Gobernador a anuncia oficialmente cu Sra. LaSorte a acepta e tarea di informacion aki y tin e tarea pa entrega un rapport por escrito na Gobernador tocante e resultado di e tarea no mas tarda cu dia 20 di december 2024.

Lider di partido MEP Evelyn Wever-Croes:

MEP ta dispuesto pa sinta na mesa y pa forma parti di e siguiente gobierno si esnan prome yama ta desea esey

Diamars ultimo lidernan di e cuater partido politico cu a resulta victorioso den eleccion parlamentario di dia 6 di december, Wendrick Cicilia di AVP, Evelyn Wever-Croes di MEP, Gerlien Croes di Futuro y Otmar Oduber di PPA, a reuni cu su Excelencia Gobernador di Aruba, Alfonso Boekhoudt, pa inicia cu e proceso di consulta y sondeo di posibilidadnan pa formacion di e siguiente Gobierno di Aruba.

Den su declaracion na prensa despues di su reunion cu Gobernador, segun e noticiero local Noticia Cla, prome minister demisionario y lider di MEP, Wever-Croes, a indica cu e reunion a bay bon, pero a remarca cu partido MEP no ta e prome partido yama pa forma gobierno basa riba loke e resultado di eleccion ta. El a splica cu aunke nan no ta e prome partido yama pa forma gobierno, MEP ta dispuesto pa sinta na mesa cu e partidonan pa mira posibilidadnan pa formacion di e siguiente gobierno, sin exclui niun partido.

Durante campaña politico na varios ocasion e mandatario a subraya cu partido MEP ta habri pa traha cu tur partido, si pueblo dicidi cu esey ta loke nan kier, pero menos cu partido AVP. Bon Dia Aruba a tuma contacto cu e prome minister demisionario pa puntra kico a



cambia cu awor si ta habri na un posibilidad pa traha cu AVP. Na mesun momento a puntra kico e ta pensa a influencia e resultado di eleccion, ki posibilidadnan di gobernacion e ta mira y si e ta nota cu tin apertura entre e otro partidonan pa MEP drenta coalicion.

E mandatario a splica den su contesta cu loke a cambia ta cu MEP no a sali e partido mas grandi y nan no ta e prome yama pa forma un coalicion. El a resalta cu nan ta dispuesto si pa sinta na mesa y pa forma parti di e siguiente gobierno si esnan prome yama ta desea esey.

Pa loke ta trata kico e ta pensa a influencia e resultado di eleccion, el a splica cu despues di shete aña di gobierno semper tin desgaste. El a indica cu den pasado tampoco nunca un partido cu a goberna pa dos termino, a gana e siguiente eleccion. Sinembargo, el a destaca, cu nan ta hopi satisfecho y orguyoso cu e desgaste ta solamente 11%, cu ta 3,000+ voto, compara cu ultimo bi-



aha cu tabata tin un situacion similar, na unda AVP na 2017 a perde casi 10 mil voto.

El agrega cu ademas, MEP a keda e partido mas grandi den cuater di e seis districtonan di Aruba, y alabes a enfatisa cu e reconocimiento di su persona como votegetter "tabata un sorpresa y realmente ta un honor enormemente grandi pa haya un reconocimiento asina. Pues nos ta satisfecho toch."

Lider di partido Futuro, Gerlien Croes, a remarca den su declaracion na prensa cu alinacion di programa di partido ta e aspecto mas importante aworaki pa su partido, e noticiero a reporta.

Croes tabata e di tres lider cu a reuni cu Gobernador pa discuti, entre otro, e resultado di eleccion parlamentario di diabierna ultimo. Segun e portal a señala, Croes a splica cu prome cu nan yega na e punto di papi cual partido ta traha cu otro, mester mira prome cual programa di partido ta alinea cu otro. El a indica tambe cu



manera tur combersacion, mester tin disponibilidad di e partidonan pa entrega cierto puntonan basico keda para.

Croes a resalta cu ta importante pa trata e aspecto financiero. El a enfatisa cu un otro punto hopi importante pa partido Futuro ta e bahamento di gasto di gobierno, cual ta un aspecto cu e partido a boga p'e durante su campana.

Pa loke ta trata cartera di minister y otro asunto, e noticiero a reporta, e lider di Futuro a indica cu ta prematuro ainda pa discuti e aspectonan aki y cu primeramente mester alinea e programanan di partido pa wak nan compatibilidad prome cu determina e siguiente paso den e proceso.

Croes a remarca cu loke ta hala atencion aworaki ta cu e partidonan grandi ta cambiando di postura, locual el a señala ta haci'e dificil pa partido Futuro formula un pensamiento fiho tocante e partidonan aki

Lider di partido PPA, Otmar

Oduber, tabata e ultimo lider di partido cu a reuni cu su Excelencia Gobernador di Aruba. E portal Noticia Cla a indica cu e mensahe di Oduber tabata cu no por descarta loke pueblo a vota p'e.

Igual cu e otro lidernan, Oduber a reuni cu Gobernador pa discuti tocante e resultado di eleccion y con partido PPA ta mira esaki. Oduber a resalta cu 11 mil persona, refiriendo na e mas di shete mil cu a vota pa Futuro y mas di tres mil cu a vota pa PPA, a demostra cu nan kier un cambio den maneho y un partido cu un programa cla. El a agrega cu e ta dispuesto pa sostene un gobierno activamente si e ser invita pa esaki.

Segun e noticiero den un parti-jraad partido PPA lo dicidi ken lo representa partido PPA den parlamento teniendo na cuenta cu dia 22 di januari hues ta dicta sentencia den caso Flamingo, caso den cual Oduber ta e sospechoso principal.

Anteriormente su persona mes a indica cu si e sentencia no ta uno positivo p'e, e no lo drenta parlamento. Den caso cu e sentencia ta positivo y e keda absolti di e cargonan, segun e portal Noticia Cla, Oduber a indica cu e mes lo representa partido PPA den Parlamento di Aruba y "lo ta manera un klier of carpata riba e otro parlamentarionan pa tene nan riba e promesa cu a haci na pueblo."